



## 拗蠻个番鴨公

該大隻个番鴨公在園仔裡背行上行下、這看該看。尾下，佢在籬笆脣號著一個所在，就同大家講：「這係佢屋下，麼人都做毋得行入來。」佢講等，就同邊脣看好戲个人逐走。

所在係大家人个，仰做得號來自家享受？有人別試行前去試看啊，該所在敢就係番鴨公个？哪知得，一行前正經就分佢逐出來。細鴨仔看佢大隻，打佢又毋贏，拗乜無法，隻隻都譴嘟嘟仔，對佢無結無煞。

老鴨仔話大家人：「佢恁拗蠻，莫搵佢就好，多得大家人莫行兼，隨在佢去，佢等莫多事就好。」大家聽著老鴨仔勸話，恁啊該也毋成所在，就無愛同該番鴨公計較。

番鴨公看著大家毋敢有意見，就緊來緊大膽。佢同厥竇緊圍緊闊，範圍已經大啊會犯著別人，有人就去話佢，想愛監佢同竇做細兜仔，自家有好歇就做得地。

「仰仔麼？愛相打麼？」見有人行前去尋佢參詳，番鴨公就壞面起來，惡蹶蹶仔閉開厥翼，想愛同人相打。大家正式無結無煞，就係老鴨仔看著也緊拂頭講：「仰會有恁拗蠻又歪格个人？自家用毋著恁闊个所在，又毋分人行前去！」

番鴨公知著，就來尋老鴨仔，佢無恁自家年紀過細，開聲就罵：「你老顛棟麼？佢就係有本事，正號得著恁闊个所在來享受。自家無本事，又好講人，講佢歪格？佢係有才調正得！」番鴨公講核，風神个同翼閉閉，啞啞喊喊行歸厥竇。

有一隻後生个鴨仔看著番鴨公連老鴨仔都欺翕，心肚仔盡毋盼得，就同該兜鴨仔講佢想愛去尋番鴨公解決。大家人看著厥樣仔就勸話佢：「你恁細隻，萬一多事起來，敢係厥對手？」

該後生鴨仔同大家人講：「佢又無講愛用拗蠻个。」講核，就頭沉沉仔行開。

第二日朝晨，後生鴨仔聽著主人來園仔項个聲，就走去番鴨公个竇脣。佢都還無開嘴講話，番鴨公就閉開翼，大聲喝：「又來也！這係佢屋下，這下無分你好看，你毋知佢个厲害。」話正講核，厥翼就抓等後生鴨仔个頸根。

大家看著兩隻鴨仔相打也，就圍等地噉噉噉噉。主人聽著鴨仔喊啊恁大聲，就共快走去看。佢一看啊著兩隻鴨仔抓等頸根在相打，飼料都還無倒入豬兜，就同該兩隻鴨仔扭起來。主人看看啊，就同後生鴨仔放核，同番鴨公扭入布袋。後生鴨仔走開後，大家圍等佢講：「阿姆哀，好得主人放過你，有嚇著無？」

後生鴨仔看著大家人嚇啊面呷青，就噉等地講：「有時節，毋係大隻贏人，其實主人淨會扭大隻个鴨仔，佢毋打眼，毋驚！顛倒係該番鴨公著著佢計也！」

作者：陳志寧

### ☆詞彙學習☆

【拗蠻】au' man'：霸道。

【別試】ti sii：故意。

【搵】ten：搭理、理會。

【多得】do' ded'：大不了。

【歪格】vai' gied'：品性上有瑕疵。

【頭沉沉仔】teu' dem' dem' e'：低頭不語的樣子。

【面呷青】mien gab qin'：臉色鐵青。

【毋打眼】m' da' ngian'：不顯眼、不吸引人。